

СЕРАФИМ ЗВЕЗДИНСКИЙ



МОЛИТВЫ,
СОСТАВЛЕННЫЕ
В ЗАКЛЮЧЕНИИ



В данной книге собраны молитвы священномученика Серафима (Звездинского), составленные в заключении. Сщмч. Серафим пр написал следующие молитвословия: «Покаянный плач», «Акафист Господу Иисусу Христу Терноносному и Крестоносному (написан в Бутырской тюрьме).

Акафист Господу Иисусу Христу, Искупителю и Спасителю грешных, Сладчайшему, в нашествии горчайших искушений и страстей», «Канон «Мати Милосердная, не отрини, прими, прости, благослови», «Канон «Владычице Пресвятой Богородице, поемый в безнадежи», «Акафист Животворящему Кресту», «Акафист святой мироносице Фамари Блаженной».

Новомученник св. Серафим Звездинский родился в 1883 г., после своего чудесного исцеления по молитве к св. Серафиму Саровскому, принял в 1908 г., монашеский постриг. С 1912 г., преподаватель Московской духовной семинарии, с 1914 г., архимандрит, в 1920 г. хиротонисан во епископа Дмитровского, викария Московской епархии.

В советские времена подвергался гонениями и ссылкам. Неоднократно арестовывался за проповедование веры, был приговорен к расстрелу.

В августе 2000 года на юбилейном Архиерейском соборе был канонизирован в лике новомучеников Российских.

Серафим Звездинский

Молитвы, составленные в заключении

Кондак 1

Возбранный Воеводо и Господи Иисусе Христе, Сыне Бога Живаго, мене, грехом умерщвленнаго, мене, тьмою страстей помраченнаго, просветити и оживити хотя, приклонив небеса, снизшел еси ко мне даже до смерти, смерти же крестныя. Пред сим неисповедимым величием любви Твоея Божественныя преклонялся, пред Крестом Твоим Честным, потоками Животочныя Крови Твоея изобильно напоенном, ниц распростирался, со благодарением многим, со умилением теплым, с молением слезным, с сердцем горящим, вопию Ти песнь сицевую, мольбу Ти приношу таковую: Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Икос 1

Ангелов Творче и Господи Сил, Ангел предста Ти, в саду Гефсиманстем, укрепляя и утешая Тя, егда бремя тяжкое грехов моих толико отяготе на рамах Твоих, яко скорбети Ти зело и ужасатися. В сию скорбь Твою Гефсиманскую со благоговением, со страхом и трепетом великим проникая, от души взываю Ти сице:

Господи мой, Господи, учеником Твоим в скорби рекый: «Молитесь, да не внидите в напасть», — се найде на мя напасть велия, се постиже мя скорбь лютая, молитвою неотступною удержи мя, молю, от отчаяния, молитвою слезною удержи мя, прошу, от роптания. / Иисусе мой, Сладчайший Иисусе, Петра и обоих сынов Зеведеевых, Иакова и Иоанна, в глубь Гефсимании взявый с Собою, да будут свидетелями вопля Твоего крепкаго, воздыханий неизглаголаных, слез молитвенных, возьми и мя, люто страждуща ныне, с Собою и соделай созерцателем честных страданий Твоих, да своя страдания с терпением перенесу аз малодушный. / Христе мой, Пресладкий Христе, в Гефсиманстей веси скорбевший, ужасавшийся и туживший, призри на мя, яко скорблю, яко ужасаюся, яко тужу; скоро услыши мя, вонми души моей и избави ю от туги сея горчайшая. / Сыне Божий Единородный, носяй всяческая глаголом силы Своея, в молитве за грехи моя падый лицом Своим Пречистым на самую землю, подыми мя падшаго, воззови долу поникшаго. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 2

Вижду Тя, Господи Боже мой, в вертоград Гефсиманский вшедшаго, на вержение камня от апостол отошедшаго, вижду, о Спасителю мой, колена преклоньшаго, молящагося, и со удивлением благоговейным вопию Ти: Аллилуиа.

Икос 2

Разум изумевает пред глубиною богатства премудрости и разума Твоего, Боже Спасителю мой: воистину неиспытаны суды Твои и неизследованы пути Твои в деле спасения падшаго человека. Темже взываю Ти, Благодетелю моему, гласом мольбы сицевая:

Господи мой, Господи, в молитве Отцу Твоему сице воззавый: «Отче Мой, мимо неси от Мене чашу сию», — се, припадая Ти, молюся аз, во искушении тяжцем сый: умилосердися надо мною, мимо неси от мене чашу испытаний моих, да вера моя не оскудеет во мне. / Иисусе мой, Сладчайший Иисусе, в молитве Гефсиманстей волю Свою в волю Отца всецело предавый, тако моливыйся: «Не якоже Аз хошу, но якоже Ты, обаче не Моя воля, но Твоя да будет», — услыши мя, слабого и непостояннаго, в час испытания моего и невзгод моих, сице молящагося Ти: «Боже мой и Господи мой, аще угодно сие есть пред Тобою, да скорби, нужды и искушения обдержат мя отовсюду; аз грешный, всякия казни достойный, не смею противовещати Ти, но смиряюся под крепкую руку Твою: буди воля Твоя; не якоже аз хошу, но якоже Ты, да будет воля Твоя, благословен еси, Господи! / Христе мой, Пресладкий Христе, от туги тяжкия Гефсиманския весь изнемогающий в молитве, но николиже ослабевающий, неотступно прилежно в подвиге молитвенном пребывающий, даже до пота, каплями крове каплющаго на землю, Ты вдохни в мя, нерешительнаго, молюся, решимость подвигом добрым даже до смерти подвизатися, да не ктому себе живу, но Ты, Жизнь Безконечная, да живеша во мне, да и аз в Тебе. / Сыгне Божий Единородный, от молитвы ко учеником Своим возвративыйся и обретеный их спящими от печали, бяху бо очи их отяготели, се и аз отяготех от печали моя, страх и трепет прииде на мя, и покрыла мя есть чуждая тьма, окаяннаго; возбуди мя спящаго, воодушеви мертваго, помози беспомощному. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 3

Сила моя во мне оскуде, Господи, Всемогущий Господи, се утрудихся зовый, исше гортань мой, истомилися суть очи мои от ожидания Тебе, Христе мой, Христе мой! Се поношения поносящих Тя нападоша на мя: аз заключен и не могу выйти, изнеможе крепость моя, се жду соскорбящаго и — несть, и утешающих и — не обретаю, ниц и боляй есмь аз... Услыши мя, Иисусе, услыши, мене ради обнищавший,

укрепи мя, мене ради изнемогший, спасение Твое, Боже, да примет мя, да от души исцеленный вопию Ти: Аллилуиа.

Икос 3

Имея пред очима моима, Иисусе, Спасе мой, преднаписанный Божественными Евангелистами образ Тебе, страждущаго, всего уязвленного, се прихожду к Тебе аз, страждущий, с неисцельными гноящимися язвами сердца моего страстнаго и, веруя несомненно, яко язвы Твоя — исцеление мое и болезни Твоя — здравие мое есть, сице вопию Ти:

Господи, мой Господи, от беззаконных уст оплеваемый, безчестуемый, унижаемый, умилосердися, воззри на мя: страсть греховная душу мою безсмертную — дыхание уст Твоих — безчестит, унижает: исхитити мя от плена страсти сея потщися, погибаю. / Иисусе мой, Сладчайший Иисусе, венчай землю цветами, тернием острым увенчанный, виждь, колико острых терний, нелепых помышлений, неподобных мечтаний терзает главу мою: исторгни их, молю, и цветами благих мыслей, святых чувствований украси мя. / Христе мой, Пресладкий Христе, одеяйся светом яко ризою, в ложную багряницу от области темныя облаченный, ризу мне подаждь светлу, яко лежу наг пред враты Твоими и срамляюся, стыждуся плоти своея. / Сыне Божий Единородный, на небесех от Ангел с трепетом священным и любовию огнепламенною присно окружаемый, на земли же страха ради всеми оставленный, исполни всего мя дерзновения и мужества, да никоего же убоюся страха человеческого, никия муки, самая лютейшая, да дерзновенно Тя исповедаю, Твое величие проповедаю: / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, вконец изнемогающаго!

Кондак 4

Буря страстей в сердце моем возшуме, се внидоша воды до души моя, углебох, приидох во глубины морския... се сниде дождь и приидоша реки, и возвеша ветры греховнии, и нападоша ныне на храмину мою! Спасителю мой, бурь Утишителю, рцы бури моей, повели волнению моему: «Молчи, престани», — и по глаголу Твоему буди тишина велия, да в тишине сей благодарно зову Ти: Аллилуиа.

Икос 4

Слыша Петр, отвергийся Тебе, обличительный глас алектора и, изшед вон, плакася горько. Плачу ныне и аз горце, зря себе удаленным от Тебе, Источника всякия радости, Света, Утешения, и в плаче моем сице восклицаю Ти: Господи мой, Господи, от законник о учении Твоем истязуемый, не истязуй совесть мою о содеянных мною злых, яко безответен есмь; аще беззакония назриши, кто постоит? / Иисусе мой, Сладчайший Иисусе, от Каиафы лжесвидетельствуемый, оклеветаемый, како аз воззрю на Тя, егда возводимыя на мя клеветы и напраслины терпети не могу, смущаюся, раздражаюся. Твоим долготерпением мое нетерпение покрый, Долготерпеливе, Христе мой, Пресладкий Христе, от Ирода поругаемый и уничижаемый, / что реку Ти и что возглаголю, егда на кийждо час зрю себе превозносящаяся, гордящаяся? Уничижением Твоим, смирением Твоим, победи, молю, ничим не победимую гордыню мою. / Сыне Божий Единородный, от Пилата неправедно судимый и зле осуждаемый, кий ответ Тебе дам, яко бервно, еже во очесе моем, не чую, сучец же, сущий во оце брата моего, всегда вижду, себе не сужду, иных же всегда осуждаю. О, Судие мой, научи мя всюю душею, всюю жизнью исполняти великую заповедь Твою: не судите, да не судимы будете! / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго!

Кондак 5

Боготочную Кровь Твою, на Кресте излианную, в Божественной литургии дал еси мне, Агнче Божий, яко утешение превеликое во всех скорбех моих, яко сладость пресладкую во всех гбрестех моих, яко силу непобедимую во всех немощех моих, яко источник безсмертия в смертности моей. За сию милость Твою неизреченную, за сей дар безценный, за сию любовь Твою неизмеримую от всея души благодарная вопию Ти: Аллилуиа.

Икос 5

Видев Пилат величие Твое в унижении Твоем и невинность Твою в противу Тя обвинениях, Боже Спасителю мой, восхоте отпустить Тя, ко жестоковыйному народу глаголя: «Кого хотите от обою отпущу вам: Варавву ли или Иисуса, глаголемаго Христа?» Аз же, повинный весь, припадая Ти, Судии моему и Творцу моему, взываю Ти тако:

Господи мой, Господи, от народа неблагодарнаго, Тобою облагодетельствованнаго, слышавший глас неблагодарный, на вопрошение Пилатова ответствовавший: «Не Сего, но Варавву». / Колико много и аз неблагодарный забывах благоденяния Твоя, на мне недостойном, яко дождь благодатный изобильно излианный, и сего ради тако много унывах. / О, научи мя, Учителю Благий, присно памятовати прежняя милости Твоя, да памятованием сим ободренный, николиже унываю в злостраданиях моих. / Иисусе мой, Сладчайший Иисусе! К распятию крестному криком беззаконных: «Распни, распни Его!» влекомый, распни волю мою мятежную, злую, яко несть мне мира от нея, несть покоя, несть отрады, / но да будет во мне присно воля Твоя благая, совершенная, мир, покой и радость всей жизни моей дающая. / Христе мой,

Пресладкий Христе! Носяй терновый венец и багряну ризу, Пилатом народу тако изведенный, даруй мне с радостию, и веселием, и благодарением носить поношение Твое, уничижение за Тебе. / Сыне Божий Единородный, Пилатом нареченный «Се, Человек», оком благосердным воззри на мя, се аз яко человек согреших, Ты же, яко Бог щедр, помилуй мя, видя немощь души моя. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 6

Проповедуют мне громогласно славу Твою небеса Твоя звездокая, Создателю мой, творение же руку Твоею возвещает твердь, о любви Твоей безсмертной язвы Твоя пречистыя всегда со Креста вещают. Славлю славу Твою, величаю дивная творения Твоя, воспеваю любовь Твою, за мене распятую, поя Ти: Аллилуиа.

Икос 6

Возсияй, Свет сый Христе, от присносущнаго Света Твоего душе моей, страстями оскверненной, горестию омраченной, да во свете Твоем узрю свет избавления, спасения и возстания моего, и возмогу пети и молитися сице:

Господи мой, Господи, на суде ответа судии неправедному не давай, яко агнец кроткий молчавый, се молчу, благоговею, ныне безмолвствую пред непостижимыми судьбами Твоими, скорбями, яко путем верным ко спасению мя ведущими. / Иисусе мой Сладчайший, Иисусе, Пилату рекий: «Не имаши власти ни единыя на Мне, аще не бы ти дано свыше», научи мя в каждом шаге, в каждом слове жизни моя познавати вышнюю волю Твою, да под крепкую руку Твою всегда аз смиряюся. / Христе мой, Пресладкий Христе, егда бе пяток Пасце, час же яко шестый, от Пилата народу иудейскому провозглашенный: «Се, Царь ваш», молю Тя, Царю Небесный, / царствуй в уме моем дольном, да мудрствует всегда горняя; царствуй в сердце моем хладном, да Тобою, Огнем поядающим, в любви Божественной воспламеняется; царствуй в воле моей непостоянной и слабой, да будет крепкой и постоянной в хождении пред Тобою. / Сыне Божий Единородный, народом Своим пред Пилатом с криком безумным: «Не имама царя, токмо кесаря» отверженный, се аз, аще и изменяю Ти на всякий час, но Царем моим признаю Тя, Господом и Богом моим исповедую Тя, / темже и дерзаю просити Тя в скорби моей, в туге моей тяжчей: «Не отвержи мене, не остави до зела, яко отец мой и мати моя остависта мя, Ты же восприимй мя». / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 7

Хотя многажды путем заповедей Твоих ходити, Господи Боже мой, многажды паки совращахся с пути Твоего, падая и возставая, крепяся и изнемая, моляся и леняся, подвизаяся и ослабевая. О, окаянный аз человек, вем со Апостолом, яко не живет во мне, сйречь в плоти моей, доброе, ибо хошу доброе и сие не творю, не хошу злое и сие содеваю. О Милостиве, Сам мя, Спасе, спаси от мене самага, да выну взываю Ти: Аллилуиа.

Икос 7

Дивлюся, Спасителю мой, видя, яко неся Крест Свой, изшел еси Ты на глаголемое Лобное место, еже глаголется еврейски Голгофа. О, снизхождения Твоего безмернаго, Создателю мой, о, долготерпения Твоего неизреченнаго, Владыко мой! Со страхом и радостию целую стопы Твоя на Голгофском шествии Твоем, сице взываю Ти:

Господи мой, Господи, под тяжестью Креста толико изнемогавший, яко воином обрести некоего человека Киринейска именем Симона, емуже и задеша понести Крест Твой, сподоби и мя малодушнаго крест жизни моя, яко малую ладью к Твоему Кресту, яко великому кораблю, присоединити, да силою сею по волнам носимый, безбедно преплыву пучину моря житейскаго. / Иисусе мой, Сладчайший Иисусе! Дщерем иерусалимским, плакавшим по Тебе, рекий: «Дщери иерусалимския, не плачите обо Мне, но плачите о себе и о детях ваших», услыши, услыши ныне плач мой сей: се бо плачу, о себе плачу, о убожестве моем, нагоде моей, скудости моей плачу, о страстности моей, греховности моей. / Христе мой, Пресладкий Христе, к злодеям причтенный, со беззаконными вмененный, не вмени мне во грех малодушия и уныния моего. / Сыне Божий Единородный, надписание над главою Своею на Кресте от Пилата сицевое имевый: «Иисус Назорей, Царь Иудейский», напиши во мне имя Твое, паче меда и сота сладчайшее, да на всяк день и час уста моя исповедуют имя сие, ум мой мыслит именем сим, сердце чувствует жизнь и сладость имени сего. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 8

Странен был еси Ты, Иисусе мой, не имея, где главу подклонити, дондеже, странствуя, на Голгофу возшел еси, идеже на Кресте главу Свою преклонил еси, силам небесным со удивлением поющим Ти: Аллилуиа.

Икос 8

Всего Себе, Спасе, истощил еси, всего Ся предал еси, всего любовью объял еси мя, в страданиях Своих до конца возлюбивый мя, Иисусе мой, Любы неизреченная! Сею огненною любовью Твоею сердце мое воспламененное молитвенную песнь сицевую приносит Ти:

Господи мой, Господи, о Егоже одежде воины меташа жребий, кто что возмет, в руку Твоею жребии мои суть. Научи мя, како взяти иго благое и бремя Твое легкое и сия терпеливо носить. / Иисусе мой, Сладчайший Иисусе, пречистыя руце Твои, имиже создал мя еси, прострый на Кресте, прими воздеяние руку моею, яко жертву вечернюю, во облегчение тяжестей многих грехопадений моих. / Христе мой, Пресладкий Христе, нозе Свои, слезами грешных орошенныя, имый гвоздьми пригвожденныя, направи стопы моя, во еже тесным тернистым путем Твоим неуклонно шествовати к вечному Царствию Твоему. / Сыне Божий Единородный, от единого от воин копием в ребра Своя прободенный, живым и действенным Словом Своим, острейшим паче всякого меча обоюдоостраго, пронзи душу мою огрубевшую. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 9

Все естество ангельское, Небеса и вся Силы, со страхом и трепетом к распятому Ты на Кресте принокша слышати молитву Твою, еуже молился еси, глаголя: «Отче, отпусти им, не велят бо, что творят». Изумившися толицей любви Твоей, взываху Ти: Аллилуиа.

Икос 9

Ветия, проповедник дивный всепрощающия любве Твоя явися разбойник благоразумный, егда на кресте с Тобою, Иисусе, уязвився, помолися Ти: «Помяни Мя, Господи, во Царствии Твоем», Ты же, отвечав, рекл еси: «Аминь глаголю тебе, днесь со Мною будеши в раи». И аз Ти глас сицевый приношу:

Господи мой, Господи, разбойнику рая двери отверзый, отверзи ми двери милости Твоя. Се толку в них, не затвори, Ты бо рекл еси: «Толцые и отверзетсѧ вам». / Иисусе мой, Сладчайший Иисусе, ошуюю хулимый, одесную благословляемый, наполни уста мои моления Твоего, яко да пою славу Твою, весь день благословляя Тя, мене Крестом благословляющаго. / Христе мой, Пресладкий Христе, и на Голгофе милующий, среди страданий благодеющий, вразуми мя во всех страданиях и бедствиях моих милость Твою познавати, благодеяния Твоя воспети. / Сыне Божий Единородный, на все вопли безумных не отвечающий и со Креста не сошедый, но на Кресте вся муки до конца претерпевый, стыждуся малодушия моего, яко от нетерпения многажды устремляхся сойти со креста моего, прости мя, Долготерпеливе. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 10

Спасти мя хотя, Спасителю Боже, изшел еси на искание мене, на землю пришел и тамо не обрете, и даже до ада снизшел еси. Слава Тебе, Искупителю мой, пою Ти: Аллилуиа.

Икос 10

Царю Превечный, превозносимый отцев Боже, во веки благословенный, от рабов на Крест вознесенный, мысль мою и сердце к Тебе, Искупителю моему, возношу, вопия Ти молитвенно сице:

Господи мой, Господи, Солнце правды сый, на запад Голгофы зашедый и последний луч любве Своя Божественныя Пречистой Матери и возлюбленному ученику посылай, / поели свет Твой и истину Твою, да та мя настависта в гору святую Твою, яко да во свете лица Твоего пойду и о имени Твоем возрадуюся вовеки. / Иисусе мой, Сладчайший Иисусе, со Креста к Деве Благословенной, плакавшей и рыдавшей, во утешение воззавый: «Жено! се, сын Твой», и ученику: «Се Мати твоя», / омофором пречистым Богоматере, из страданий Голгофских Ея сотканным, слезами Ея, яко жемчужинами драгоценными украшенным, покрый мя от всякого зла. / Христе мой, Пресладкий Христе, страданьми Твоими основания земли восколебавый, камни сокрушивый, сокруши окамененное сердце мое, безчувствие мое, да с царем-пророком предзрю и чувствую Тя всегда близ мене, да не подвйжуся. / Сыне Божий Единородный, Страстию Твоею омрачивый свет солнечный, яко быти тме по всей земли от шестаго часа до девятого, помрачи пред очесы моими вся скоротекущая красоты мира сего суетнаго, / да николиже вижду их, яко сор и прах да вменияю их, да умом, сердцем моим Тя всегда созерцаю, Единую Вечную Красоту. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 11

Пение мое, крепосте моя, спасение мое, радости моя, избави мя от обышедших мя, Иисусе Сладчайший, скорое и известное даждь утешение рабу Твоему, приближися мне, везде сый, да и аз возмогу с псалмопевцем воспети песнь сию: «Аще бо пойду и посреде сени смертныя, не убоюся зла, яко Ты со мною еси». Аллилуиа.

Икос 11

Светоподательный светильник Твой, Свете тихий безсмертного Отца Небесного, глас Твой, Слово Божий, Предтеча «покайтесь!» вопиет людям «и предпочиститесь, се бо предстоит Христос, Агнец Божий, вземляй грех всего мира». Се и аз покаянным гласом Тебе зову:

Господи мой, Господи, в девятом часу гласом велиим возопивый: «Или! Или! лама савахфани», еже есть: «Боже Мой! Боже Мой! вскую Мя еси оставил». / Молюся Ти, не остави мене, не отступи от мене, прииди, да не отыду и ктому не буду, прииди, да до конца не погибну, спаси мя. / Иисусе мой, Сладчайший Иисусе, зном страданий палимый, «Жажду!» возгласивый, возбуди во мне жажду общения с Тобой, Источником воды живыя, да упиюся от потока сладости Твоей, от прободенного ребра Твоего истекшаго. / Христе мой, Пресладкий Христе, оцтом и желчию напоенный и по сем воззававый: «Совершишася», соверши во мне дело спасения Твоего, / всего мя обнови, возроди, ветхаго человека совлеки и в новаго, не по плоти, но по духу ходящаго, облещи. / Сыне Божий Единородный, Дух Свой Отцу со Креста предавый, рекый: «Отче, в руце Твои предаю дух Мой». И сия рек, главу преклони и издше. / Се, главу мою пред величием Твоим преклоняя, аз вручаю Ти, Промыслителю, дух мой, всю жизнь мою веди мя, камо хощеша, твори, како волиши. / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 12

Благодать превеликая от Креста Твоего, Иисусе, изобильно подается всем, с верою поклоняющимся Кресту Твоему и с любовью лобызающим Его. Такжеже благодатию велиею облакается всяк, иже благоговейно крестным знамением себе ограждает, есть бо сие оружие непобедимое, демонов трепет, Ангелов присно радование, хвала православным, вопиющим: Аллилуиа.

Икос 12

Поя страдания Твоя, поклоняюся и тридневному погребению Твоему, восхваляю и светоносное Воскресение Твое, верую со всеми мытарями и грешниками, благодатию Твоею спасенными, яко имея Тебе, Спасителя моего, николиже погибну, аще и быша были грехи мои, яко багряное, Ты же, яко волну, их убелиши, аще и умножися во мне грех мой, преизобилует во мне благодать Твоя. Тако жива будет душа моя и восхвалит Тя, и судьбы Твоя помогут мне. Сего ради и устам моим не возбрани, во еже звати Ти:

Господи мой, Господи, чрез созерцание страданий Твоих сотника к познанию Тебе, Премудросте Божия, приведи, во еже воскликнути ему: «Воистину Божий Сын бе Сей», / се и аз, созерцанием страданий Твоих умиленный, исповедую Тя с первоверховным Петром купно: «Ты еси Христос, Сын Бога Живаго». / Иисусе, Сладчайший Иисусе, от Иосифа благообразнаго и Никодима, ученика Твоего потаеннаго, плащаницею чистою повитый, со благоуханьми во гробе нове положенный и боголепно погребенный, да будут беды моя и скорби жертвою благоуханною пред Тобою, и слезы моя, яко миро на Гроб Твой, прими. / Христе мой, Пресладкий Христе, печатую, яко сокровище безутешное [Т. е. своим погребением вызвавшее безутешную скорбь.], во гробе запечатанный, вем, яко вся невзгоды и тяготы, Тобою мне низпосылаемая, печать Твоя святая суть. / Благодарю Тя, яко сею болезненною печатую Твоею запечатлеваемый, да тако запечатленный не утерян буду от Тебе, непрестаннаго Искания сердца моего. / Сыне Божий Единородный, к Егоже живоносному Гробу жены- мироносицы с миром течаху, плачущия горько и вопиющия: «Сия Суббота есть преблагословенная, в нейже Христос, уснув, воскреснет тридневен». / Се с ними и аз, аще ленив сый, обаче во след Тебе теку, аще и зело немощен сый, обаче в путь Твой шествую, аще и малодушен сый, обаче крест мой несу, Тебе моляся, вопию: / Господи Иисусе Христе, Сыне Божий, в несении креста спасительнаго, десницею Твоею мне низпосланнаго, укрепи мя, в конец изнемогающаго.

Кондак 13

О, Господи Иисусе Христе, Сыне Божий, се предстою пред Тобою со страхом и радостью, страхом убо недостойнства ради, радостью же милосердия ради, и из глубины души моя вопию Тя: «Не отвращай лица Твоего от мене, Господи мой, Господи, поне же по грехом и мерзостем моим достоин отвращения сего, но образ есмь неизреченныя Твоя славы, аще и язвы ношу согрешений». Грешен есмь, но Твой есмь аз, спаси мя, заступи, сохрани, защити, помози, укрепи, в сени крил Твоих от зноя бед и страстей мя укрой, да Тобою хранимый, Тобою спасаемый, взываю Ты с воинствами Ангельскими, вопию Ты со пророками, возглашаю Ти со апостолами, проповедую Тя со страстотерпцами, молюся Ты от всего сердца со преподобными, поя, вопия, взывая и глаголя во веки неисчетную: Аллилуиа, Аллилуиа, Аллилуиа.

Этот кондак читается трижды, затем первый икос и первый кондак.

Акафист был написан еп. Серафимом во время заключения в Бутырской тюрьме в 1923 г.

АКАФИСТ Господу Иисусу Христу, Искупителю и Спасителю грешных, Сладчайшему, в нашествии горчайших искушений и страстей*

У сего Акафиста в кондаках и икосах краестроичие: «Весь от страстей безмерных, яко во огне, сгораю аз, помилуй мя!» Акафист сей поется на 6-й глас, и в кондаках припев: «Помилуй...» глаголется трижды

тако: первый раз возглашает читающий сей припев и поют тойжде людие, такожде и вторый и третий. На каждый припев: «Помилуй...»творити подобает метания.

Кондак 1

Возбранный Воеводо и Господи, нас ради в ад сшедый и Собою вся воскресивый, се ныне, во аде страстей моих весь сгорая, из глубины сердца моего взываю Ти: Иисусе, ада Победителю, победи ад души моя, воскреси мя, умерщвленнаго страстьми.

Икос 1

Еврейским отроком, в пещь огненную вверженным, и к Тебе, дивному во святых, воззавшим, Ангела Твоего пославый и тем огонь в росу преложивый, вонми ныне воплю души моя, услыши стенание мое, во искушении бо зельнем болезненно Ти взываю:

Иисусе мой, Христе Многомилостиве, послми ми Ангела мирна, да утишит бурю страстей моих лютых. / Иисусе мой, Подателю просящим, подаждь ми Ангела верна наставника, да наставит мя на путь правый, в конец заблудившагося. / Иисусе мой, Христе Многомилостиве, пристави ми Ангела хранителя души и тела моего, да сохранит мя от конечнаго падения, се бо уже низвергаюся в бездну греховную. / Иисусе мой, Ангелов слава, огради мя ополчением Ангелов Твоих, всего от бесов расхищаемаго. / Иисусе, ада Победителю, победи ад души моя и воскреси мя, умерщвленнаго страстьми.

Кондак 2

Сыне Божий, Сыне Девы, Един Сый Святыя Троицы, прославляемый Отцу и Святому Духу, помилуй мя, помилуй, помилуй падшее создание Твое, имене ради святаго Твоего, се бо с Давидом в покаянии Тебе зову: помилуй мя, Боже, помилуй мя.

Икос 2

От дел моих несть спасения, Спасителю Боже мой, ибо вся дела моя студна, нечиста, мерзка, гнила: вера моя вместо дел да вменится мне. Се верую, яко услышиши мя окаяннаго, и взываю Ти сице: Иисусе мой, Христе Многомилостиве, терпети не могу уже демонскаго стреляния, ускори избавити мя, Твой есмь аз. / Иисусе мой, искушенный по-всячески, помози ми, искушаемому искусителем лукавым, немощен бо есмь аз. / Иисусе мой, Христе Многомилостиве, повелевый апостолом именем Твоим бесы изгоняти, исцели мя, беснующагося неистовством греховным, грехолюбив бо есмь аз. / Иисусе мой, сатану, яко молнию, с небесе спадша видевый, угаси молниеносныя разжженныя стрелы его, всего мя разжигающия, страстен бо есмь аз. / Иисусе, ада Победителю, победи ад души моя и воскреси мя, умерщвленнаго страстьми.

Кондак 3

Страстию Твоею, Христе, омрачивый солнце, помрачи предо мною всю призрачную светлость и сладость греха, да узрев мрачную и горькую тьму его, очи сердца моего к Тебе всегда возвожу, Солнцу Праведному, в покаянии взывая: помилуй мя, Боже, помилуй мя.

Икос 3

Ей, Господи Царю, из мертвых воскресый и сущим во гробех живот даровавый, призри на мя и услыши мя, вопию аз к Тебе таковая: Иисусе мой, Христе Многомилостиве, во гробе лежаща отчаяния моего, возбуди мя глаголом силы Твоя к надежде спасения. / Иисусе мой, Жизне вечная, оживи мя, мертвеца, Твоею жизнью. / Иисусе мой, Христе Многомилостиве, возмердеша раны моя, согниша вся струпы моя, повели, да отвален будет камень грехопадений моих. / Иисусе мой, Лазаря Воскресителю, гласом велиим воззови уму моему, в могиле нечистых помыслов поверженному: «Гряди вон». / Иисусе, ада Победителю, победи ад души моя и воскреси мя, умерщвленнаго страстьми.

Кондак 4

Безмерных страстей моих проказа велия порази мя люто, тело осквернися, ум окаляся, сердце острупися, воля развратися, несть во мне места чиста, весь проказихся: всего от верху и до ногу объят язва гноющаяся. И что сотворю, Господи и Избавителю и Заступниче уповающим на Тя, аще не к Тебе паки возвращуся и постеню, и яко проказенный воззову: «Господи, аще хочещи, можещи мя очистити». Се бо в покаянии Тебе молюся: помилуй мя, Боже, помилуй мя.

Икос 4

Яко волны морския возсташа на мя беззакония моя, бездна последняя грехов обыде мя, и се кораблец мой близ потопления есть. Ионе подражая, вопию Ти:

Иисусе мой, Христе Многомилостиве, да будет по глаголу Твоему тишина велия в волнуемом сердце моем. / Иисусе, Кормчий спасения моего, прости ми руку, яко Петрови, и спаси мя, утопающаго. / Иисусе, ада Победителю, победи ад души моя и воскреси мя, умерщвленнаго страстьми.

Кондак 5

Во огни пламенном предстоят Тебе, Господи, Серафими и многоочитии Херувими, пламенногорящии, шестокрылатии, и вся Силы Небесныя. Дивны огненных уст хвалы и песни, велелепной Славе Твоей возносимыя. Но, о Боже Саваофе, что Тебе аз принесу от моих бранных нечистых устен, кое возмогу

хваление, блудный и прескверный душою и телом, како славословити Тя дерзну? Точию сию песнь Давидову в покаянии Ти воспеваю: помилуй мя, Боже, помилуй мя.

Икос 5

Смотря пророк пришествие Твое, Христе, провозгласи: «Положил есм к нам твердую любовь, Господи: Единородного бо Сына, Благий, очищение в мир послал еси». Смотря и аз милость Твою неизреченную и любовь безмерную ко грешником падшим, не отчаяваюся во спасении своем, окаянный, но сице с надеждою Ти взываю:

Иисусе мой, Христе Многомилостиве, аще и пался есмь аз падением лютым, но памятую глагол Твой: «Аще падеши, возстани и спасешися», се ныне возстаю, поддержи мя, изнемогающаго. / Иисусе, друже мытарей и грешников, от нихже первый есмь аз, приими и мене, кающагося. / Иисусе мой, Христе Многомилостиве, с мытари и грешники ядый и пий, сподоби мя неосужденно Плоть Твою ясти и Кровь Твою Животворящую пити во оставление всех грехов моих. / Иисусе, Судие Праведнейший, блудницу, слезившую у ног Твоих, не осудивый, не осуди и мене, паче блудницы блуднейшаго. / Иисусе, ада Победителю, победи ад души моя и воскреси мя, умерщвленнаго страстьми.

Кондак 6

Гряди, душе моя, гряди, не бойся: Господь мимоходит, зовый тя на покаяние, яко некогда Адама всеродна падшаго зовьш: «Адаме, где еси?» Возстани, что спиши? Иди, воззови к Отцу твоему: «Отче мой, согреших на небо и пред Тобою, несмь достоин нарецися сын Твой, приими мя возвращающагося, яко единаго от наемник Твоих, в покаянии Ти вопиющаго: помилуй мя, Боже, помилуй мя».

Икос 6

Окаянный аз человек, разбойнику по злодейством своим уподобихся. Храм телесный, о немже Апостол Христов глаголет: «Не весте ли, яко храм Божий есте и Дух Божий живет в вас; аще кто растлит храм сей, того покарает Бог», храм сей аз, разбойник, растлих, оскверних, обезчестих, разорих, расхитих, опустоших. И ныне кары Твоя праведныя, Боже Правосудный, ожидая со страхом и трепетом, яко преступник, Царю моему вопию:

Иисусе мой, Христе Многомилостиве, пощади, пощади мя, много Тебе согрешившаго. / Иисусе мой, разбойника благоразумнаго во едином часе раеви сподобивый, помяни и мене, разбойника неблагоразумнаго, егда приидеши во Царствии Твоем. / Иисусе мой, Христе Многомилостиве, молитвами рождшия Тя Приснодевы Марии, милостив и благоуветлив буди мне, Суда Твоего праведнаго трепещущему. / Иисусе мой, милости неизследимая пучина, отврати гнев Твой, на главу мою праведно движимый, избави мя от належащаго праведнаго Твоего прещения и помилуй, помилуй, помилуй мя, тяжкаго преступника повелений Твоих. / Иисусе, ада Победителю, победи ад души моя и воскреси мя, умерщвленнаго страстьми.

Кондак 7

Разрушил еси смертью Твоею смерть, отверзл еси разбойнику рай, отверзи и мне милосердия Твоего двери, в темнице злых страстей заключенному, разруши твердыни греха, яко крепость обдержажия душу мою, Тебе бо согреших, но от Тебе не отступих, в покаянии моляся: помилуй мя, Боже, помилуй мя.

Икос 7

Юность мою всю во гресех иждих, в тине сластей и похотей плоти моя валяясь, омрачихся бо помышлением от младенчества даже и до ныне, никогдаже восхотех сотворити волю Твою святую, весь диаволу последовах всегда, смех и поругание демонов бых. Якоже отсюду, не видя себе спасения, с воплем крепким вопию Ти, Спасителю моему, исповедуя грехи моя:

Иисусе мой, Христе Многомилостиве, кий вид греха не сотворих аз, кое дело демонское не содеях? Кое деяние студное и блудное не с преимуществом и тщанием соверших? Отврати убо лице Твое от грех моих. / Иисусе мой, пленным Освободителю, всякий уд окаянных моя плоти служите и работати греху аз продах, свобода мя от работы сея вражия. / Иисусе мой, Христе Многомилостиве, кто не възрыдает мене окаяннаго? Кто не восплачет мене осужденнаго? Аз бо един лукавое пред Тобою сотворих, превозшед и препобедив вся от века грешники, несравненно прегрешивый и непрощенно, не отвержи убо мене от лица Твоего и Духа Твоего Святаго не отыми от мене. / Иисусе мой, нагих одеяние, наг и обнажен пред Тобой предстою, одей мя в ризу спасения Твоего. / Иисусе, ада Победителю, победи ад души моя и воскреси мя, умерщвленнаго страстьми.

Кондак 8

Аще беззакония назриши, Господи, Господи, кто постоит? Не постою и аз пред Судом Твоим праведным, прежде Суда осужденный моею совестью. Но понеже человеколюбив еси и ожидаеши человеческого обращения, се, якоже пречистым Твоим ногам касаяся, из глубины души в покаянии Ти взываю: помилуй мя, Боже, помилуй мя.

Икос 8

Зрю себе, Господи, близ погибели суща, ибо, яко пчелы сот, обышедше обыдоша мя дуси нечистии, и несть мне ослабления, несть мира, несть покоя, несть отрады от стужений и борений лютых, понеже бо мнози

борют мя с высоты, мнози возстают на мя, мнози глаголют души моей: «Несть спасения ему в Бозе его». Темже в борении сем находяся, яко безпомощен, взываю Ты о помощи: «Приими оружие и изостри, и возстани в помощь мою»:

Иисусе мой, Христе Многомилостиве, силою Креста Твоего запрети духу гордости и тщеславия, духу ненависти и злопамятования, духу зависти и лести, возмущающим мя. / Иисусе мой, сила моя, силою Креста Твоего запрети духу нечистому, сластолюбивому, злосмрадному, злободейному, блудному, оскверняющему мя. / Иисусе мой, Христе Многомилостиве, силою Креста Твоего запрети духу уныния, тоски, боязни, духу безнадежия и отчаяния, томящему мя. / Иисусе мой, Христе Многомилостиве, именем Твоим Божественным да угаснет всякое разжжение и движение плоти моя, от диавольскаго действия возбуждаемое. / Иисусе, ада Победителю, победи ад души моя и воскреси мя, умерщвленнаго страстьми.

Кондак 13

Помилуй мя, Святый Боже, яко образ есмь неизреченная Твоя Славы, аще и язвы ношу прегрешений. Помилуй мя, Святый Крепкий, яко не токмо немощен есмь, но и Твое есмь создание. Помилуй мя, Святый Безсмертный, яко прах есмь и пепел, земля есмь и по глаголу Твоему в землю пойду, от неяже взят бых. Темже прежде, нежели возмешь мене отсюда и отыду, и к тому не буду, прежде конца моего устнам моим не возбраню, во еже взывати в покаянии Ти всегда: помилуй мя, Боже, помилуй мя!

*Этот кондак читается трижды, затем первый икос и первый кондак 1 *.*

В рукописи акафиста кондаки и икосы с 9 по 13 отсутствуют.

Молитва Господу Иисусу Христу Спасителю

Господи, спаси мя, погибаю, се кораблец мой бедствует от искушения волн житейских и близ потопления есть. Но Ты, яко Бог Милосердный и сострадательный немощем нашим, властью убо Твоею всесильною запрети волнению бедствий, хотящих погрузить мя и низвести во глубину зол, и да будет тишина, яко ветры и море послушают Тебе.

АКАФИСТ Господу Иисусу Христу благодарственный, по причащении Святых Христовых Тайн

Кондак 1

Возбранный Воеводо и Господи, Святыми Тайнами Твоими Ты ад в душе моей победил еси ныне. Святыми Тайнами Твоими Ты тяготу греховную с совести моя непостижимо ныне снял еси. Се аз, причастник Тайн Твоих недостойный, похвальная восписую Ти тако: Иисусе Сладчайший, Хлебе Живый, Хлебе Небесный, Хлебе Сладчайший, благодарю Тя за Тайны Святыя Твоя!

Икос 1

Ангели Божии, Серафими шестокрилатии, Херувими многоочитии, Престоли огнезранныи, Господствия, Силы, Власти Божественныя, Начала, Архангели, Ангели вси! Вы лица своя закрываете пред Христовыми Страшными Тайнами, на Чашу с Боготворящей Кровию взираете со страхом великим и трепетом. Аз же, смрадный и грешный, к Чаше сей како дерзнул приступити, вами, огненнии служителие Божии, невидимую силою не отринутый? Сего ради, немолчным песнопениям вашим подражая, Божественному снисхождению удивлялся, Господу моему долготерпеливому благодарно вопию:

Иисусе, Серафимами яко Любы пламенно горящая таинственно зримый, благодарю Тя, яко мене недостойному любви Твоя безмерная насладиться преизобильно в Пречистых Тайнах ныне даровал еси. / Иисусе, Херувимами, яко Премудрость, выну светящаяся, созерцаемый, благодарю Тя, яко пречистыми Твоими Тайнами ум мой к зрению невидимыя бездны судеб Твоих подвигл еси. / Иисусе, на Престолах огнезранных странно почивай, благодарю Тя, яко во мне непотребнем Святыми Твоими Тайнами, яко на Престоле, почиваеши. / Иисусе, Горними чинами невидимо дориносимый, благодарю Тя, яко мне дольнему носить Тя во мне самом ныне благоволил еси. / Иисусе, всех Воинств Небесных непрестающее удивление, благодарю Тя, яко милости Твоя неисчетная на мне ныне удивил еси. / Иисусе, Хлебе Живый, Хлебе Сладчайший, благодарю Тя за Тайны Святыя Твоя.

Кондак 2

Вижу аз ныне, яко святыми Тайнами Твоими искуплен есмь от проказы души моя, сего ради, прокаженному самарянину подобясь, падаю ниц при ногу Твоею, Иисусе Искупителю мой, со гласом велиим хвалу Тебе вознося: Аллилуиа.

Икос 2

Разум никийже, ни горний, ни дольний, постигнута может, како Невместимый Небом Небесе Святыми Тайнами Своими вмещается весь в мя. Сего Таинства несказаннаго не постигая, точию Тебе, Господа моего, в себе ныне ощущая, со трепетом взываю Тебе сицевая:

Иисусе, в Вифании в дом Марфы и Марии вшедый, благодарю Тя, яко в дом души моя падшия ныне премилостивно вшел еси. / Иисусе, с Мариею о едином на потребу беседовавший, благодарю Тя, яко со мною